



IV GOVERNUN KONSTITUSIONÁL SEKRETARIA ESTADU KONSELLU MINISTRU

KOMUNIKADU BA IMPRENSA

Sorumutu Konsellu Ministru iha loron 21 fulan Setembru 2011

Konsellu Ministru hala'o Sorumutu iha kuarta-feira ne'e, loron 21 fulan Setembru 2011, iha Sala Sorumutu Konsellu Ministru nian, iha Palásiu Governu, iha Díli, no aprova ona:

1. Dekretu Governu ne'ebé mak aprova Konsellu Nasionál Saúde nian

Konsellu Ministru aprova ona Konsellu Nasionál Saúde nian ne'ebé hanesan órgaun Konsulta Governu nian iha matéria ba formúlasaun no ezekusaun ba polítika Nasionál Saúde nian ne'ebé reprezenta entidade sira, públika no privada nian ne'ebé iha interese ba funsionamentu entidade prestadora ba kuidadu saúde nian.

Dekretu ne'e mós prevee kompozisaun, kompeténsia no funsionamentu Konsellu Nasionál Saúde nian.

2. Rezolusaun Governu nian ne'ebé aprova Efetivu autorizadu ba FALINTIL/FDTL to'o tinan 2020

Estudu " Forsa 2020" projeta efetivu besik 3000, ne'ebé fahe ba komponente Terrestre, Navál Lijeira no Apoiu ba Servisu no Komando F-FDTL maibé hirak ne'ebé la hetan konsiderasaun mak komponente formasaun no Treinu, Apoiu Aéreo, nune'e mós Unidade Polísia Militar no Unidade Operasaun Espesiál sira.

Ho ida ne'e Konsellu Ministru aprova ona, efetivu másimu ne'ebé hetan autorizasaun atu atinje ba F-FDTL, to'o tinan 2020, hamutuk 3.600 feto/mane ne'ebé sei fahe hanesan tuir mai ne'e:

- Komando FDTL (Kuartél-Jenerál): 174 (inklui efetivu nain 13 ba Kompromisu Esternu nian);
- Komponente Forsa Terrestre (CFT): 1343 (inklui efetivu nain 120 ba Unidade Operasaun Espesiál);
- Komponente Forsa Navál Lijeira (CFNL):989;
- Komponente Apoiu Servisu (CAS):560;
- Komponente Formasaun no Treinu (CFET):250
- Komponente Apoiu Aéreo (CAA):120;
- Polísia Militar (PM): 164

Konsellu Ministru analiza mós:

1. Política Ambientál

Ministru Ekonomia no Dezenvolvimentu no Sekretáriu Estadu ba Ambiente apresenta fundamentu Política Ambientál, ne'ebé hanesan baze prinsípiu ambientál nian atu hodi orienta no define objetivu sira ne'ebé mak Governu hakarak atu alkansa iha área ne'e. Política Ambientál ne'e sei permite kria mekanizmu hirak ne'ebé mak prezisa atu halo jestaun ba ambiente ida no rekursu naturál sira país nian atu hodi bele alkansa dezenvolvimentu ida ekonómiku sustentável.

2. Lei Baze Ambiente nian

Konsellu Ministru rona tiha espozisaun kona-ba Lei Baze Ambiente nian, hodi kosidera importante tebes atu halo kriaun ida ba sistema jurídiku ambientál ne'ebé di'ak atu bele define prinsípiu no regra sira ba konservasaun no protesaun ambiente nian, no konsidera katak rekursu naturál hirak ne'e reprezenta fonte importante ida rikuso nian no hodi tulun ba kresimentu ekonómiku no ba moris comunidade sira nian.

Lei Baze Ambiente nian ne'e mós importante ba responsabilidade internasionál sira ne'ebé Estadu asume.

3. Dekretu-Lei ne'ebé regula utilizaun Fertilizante

Konsellu Ministru haksesuk ba Dekretu-Lei kona-ba utilizaun Fertilizante (aimoruk halo rai metan), ne'ebé apresenta husi Ministru Agrikultura, atu hodi garante programa nasional seguransa alimentar nian no asegura sustentabilidade ambiente nian.

4. Dekretu-Lei ne'ebé regula utilizaun Pesticida

Ministériu Agrikultura apresenta ezbosu Dekretu-Lei ida kona-ba utilizaun Pesticida atu bele iha diploma ida ne'ebé regula ninia importasaun, fabriku, faan no distribuusaun iha Timor-Leste atu nune'e labele representa perigu ida ba saúde no ambiente.